

आकाशवाणी जयपुर-अजमेर
प्रादेशिक समाचार

दिनांक 15.05.2024
समय: 18.45 बजे

- हिन्दुस्तान कॉपर लिमिटेड री खेतड़ी कने कोलिहान खान मांय काल रात फंस्या 15 जणां ने निकाळी ज्या-हादसा मांय एक अहलकार री मौत व्ही ।
- राज्यपाल कलराज मिश्र कृषि वैज्ञानिकां ऊं आब-ओ-हवा मांय बदलाव रा गलत असर ऊं साखां ने बचावण अर कम पाणी मांय बत्ती उपज लेवण सारू तकनीक विकसित करण बाबत कह्यो ।
- प्रदेश रा 27 आकांक्षी ब्लॉक्स मांय स्वास्थ्य संकेतकां मांय सुधार सारू मिशन मोड माथे काम सरू करी ज्यो ।
- राज्य मांय घणखर ठौडां लू सरीखा हालात—आवता दो दिन मांय लू रो असर और बधबा रा आसार ।

000

नीम का थाना जिला रा खेतड़ी मांय हिन्दुस्तान कॉपर लिमिटेड री कोलिहान खान मांय काल रात फंस्या 15 अहलकारां अर कर्मचारियां मांय ऊं 14 ने हिफाजत सागे निकाळ लिया ज्या है। हादसा मांय कोलकाता ऊं आया मुख्य सतर्कता अधिकारी उपेन्द्र पाण्डे री मौत व्हे गयी, ज्यां री पार्थिव देह ई निकाळ लीरीजी है। राज्य आपदा प्रतिसाद बल-कैथ रा अतिरिक्त पुलिस महानिदेशक अनिल पालीवाल बतायो के काल रात 10 बज्यां खान री लिफ्ट री केबल टूट जावण रे कारण करीब 1 हजार 875 फीट री गहराई मांय 15 जणा फंस गया हा। कैथ री टीम खेतड़ी कॉम्प्लैक्स रा अर स्थानीय लोगां री मदद ऊं रात 3 बज्यां ऊं बचाव रो काम सरू कीनो। सब ऊं पैली घणा ज़ख्मी 3 जणां ने निकाळी ज्या। हादसा मांय जख्मी 8 अहलकारां ने जयपुर रा एक गैर सरकारी अस्पताल मांय भर्ती करायी ज्या है। खान मांय काल खेतड़ी कॉपर कॉम्प्लैक्स रा मुखिया समेत निगराणी टीम उतरी ही, जिण मांय कोलकाता ऊं आया अहलकार ई शामिल हा।

000

राज्यपाल अर विश्वविद्यालयां रा कुलाधिपति कलराज मिश्र कृषि वैज्ञानिकां ऊं आब-ओ-हवा मांय बदलाव रा गलत असर ऊं साखां ने बचावण री अर कम पाणी मांय बत्ती उपज री तरकीब विकसित करण बाबत् कह्यो है। वे आज श्री कर्ण नरेंद्र कृषि विश्वविद्यालय, जोबनेर रा छठा दीक्षांत समारोह मांय बोल रह्या हा। कुलाधिपति खेती बाडी रा हलका मांय बरकत सारू विश्वविद्यालयां मांय शोध अर अनुसंधान रा विकास बाबत् लगातार काम करण री जरूरत बताई।

वे नुवी शिक्षा नीति रा तैत खेती-बाडी ऊं जुडी भणाई-लिखाई रा गुणात्मक विकास अर नौजवानां ने खेती-बाडी रा हलका मांय खुद रा काम-धंधा करण सारू तैयार करण माथे जोर दीनो। वे नौजवानां ऊं नौकरी देवण वाळा बणबा सारू कह्यो। राज्यपाल सोना रा 7 तमगां मांय ऊं 4 छात्रावां कानी ऊं हासिल करण परां वां री सराहवणा कीनी। राज्यपाल विश्वविद्यालय परिसर मांय कृषि अर पशुपालन विकास ऊं जुडी शिक्षा प्रदर्शनी ई देखी, विश्वविद्यालय रा न्यारा-न्यारा प्रकाशनां रो विमोचन कीनो अर विश्वविद्यालय परिसर मांय मलजल उपचार प्रौद्योगिकी और अपशिष्ट जल प्रबंधन संयंत्र अर खेल पेवेलियन जनता ने सूप्या।

000

देश रा पैली वाळा उपराष्ट्रपति अर राज्य रा पैली वाळा मुख्यमंत्री भैरोंसिंह शेखावत ने आज वां री बरसी रे मौके सिरधाभाव सागे याद करी ज्या। ई मौके जयपुर रा विद्याधर नगर मांय भैरोंसिंह शेखावत स्मृति स्थल परां खास श्रद्धांजलि कार्यक्रम राखी ज्यो। मुख्यमंत्री भजन लाल शर्मा अर जनता रा नुमाइंदां समेत केई नेता वां ने श्रद्धांजलि दीनी।

00000

राज्य री पहली महिला उपमुख्यमंत्री, गुजरात री पैली वाळी राज्यपाल अर 7 दफा राजस्थान विधानसभा री सदस्य रही डॉ. कमला बेनीवाल देवलोक व्हे गयी है। 97 साल री कमला बेनीवाल आज जयपुर रा एक गैर-सरकारी अस्पताल मांय आखिरी सांस लीनी। झुंझुनू जिला मांय जन्मी कमला बेनीवाल साल 2003 मांय अशोक गहलोत मंत्रीमंडल मांय राज्य री उपमुख्यमंत्री रही। वे साल 2009 ऊं 2014 तांई गुजरात री राज्यपाल रही। वे मिजोरम अर त्रिपुरा री राज्यपाल रा तौर ऊं ई सेवा दीनी। प्रधानमंत्री नरेन्द्र मोदी सोशल मीडिया प्लेटफॉर्म एक्स रे जरिये वां रे गुजरात रा मुख्यमंत्री व्हेवण री बगत कमला बेनीवाल रे वठे री राज्यपाल व्हेवण ने याद करता थकां बेनीवाल रे देवलोक व्हेवण परां दुख जतायो है। राज्यपाल कलराज मिश्र अर मुख्यमंत्री भजन

लाल शर्मा ई कमला बेनीवाल रे देवलोक व्हेवण परां शोक जतायो है। कमला बेनीवाल री पार्थिव देह रो काल जयपुर मांय पूरा सरकारी मान सागे दाग कर्यो जावेला।

000

जयपुर हवाई अड्डा माथे आज विमान अपहरण ने रोकण री मॉक ड्रिल करी ज्यी। मॉक ड्रिल रा तहत ढाका ऊं दिल्ली जा रही उड़ान ने जयपुर हवाई अड्डा माथे जबरदस्ती उतारी ज्यी। इण रो आतंकवादियां कानी ऊं अपहरण कर लेवण रे कारण जहाज मांय सवार मुसाफिरां अर जहाज रा स्टाफ री जान मुश्किल मांय पड ग्यी। जहाज ने आतंकवादियां रा कब्जा ऊं छुडावण सारु सीआईएसएफ अर राजस्थान पुलिस री ओर ऊं कार्यवाही करी ज्यी।

000

प्रदेश रा 27 आकांक्षी ब्लॉक मांय स्वास्थ्य संकेतकां मांय सुधार सारु अहलकारां ने जिम्मेदारी दीरीजी है। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह ई बाबत हुकम जारी कर र अहलकारां ने न्यारा-न्यारा ब्लॉक री जिम्मेदारी संपी है। शुभ्रा सिंह बतायो के देशभर रा पांच सौ मांय ऊं 27 आकांक्षी ब्लॉक राजस्थान मांय हैं। आं रा विकास सारु तैय करी ज्या 39 संकेतकां मांय मातृ स्वास्थ्य सेवावां अर ब्लड प्रेशर, डायबिटीज री जांच अर टीबी रा ईलाज री कामयाबी रेट ई शामिल है।

000

प्रदेश रा सगळा चिकित्सा संस्थानां मांय आब-ओ-हवा ने बेहतर बणावण अर हरियाली मांय बधोतरी करण रा मकसद ऊं **हरि-वन वृक्षारोपण अभियान** चलायो जावेला। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह ई बाबत हुकम दीना है। 1 ऊं 31 जुलाई ताई चलाया जावण वाळा ई अभियान रा तैत राज्य रा अस्पतालां मांय नींबू, आंवला, बील, जामुन, अमरुद, अनार, आम, सीताफल, इमली, चीकू, शहतूत, संतरा, नाशपती, नीम, मीठा नीम, पीपल, बरगद, शीशम, देशी बबूल, गुलमोहर, करंज, सहजन अर खेजड़ी रा करीब एक लाख पौधा रोप्या जावेला। सामुदायिक स्वास्थ्य केन्द्र अर इण ऊं निचला लेवल रा अस्पतालां मांय 5 अर आं ऊं मोटा अस्पतालां मांय 10 पौधा रोप्या जावेला। संयुक्त निदेशक डॉ. सुनील सिंह बतायो के बेहतरीन काम करण वाळा 11 चिकित्सा संस्थानां रा हरि वन मित्र रो राज्य स्तर माथे मान कर्यो जावेला।

000

राज्य रा घणखर हलकां मांय तेज गर्मी पड रही है अर लू सरीखा हालात बण्योडा है। हनुमानगढ़ जिला मांय अधिकतम तापमान 42 डिग्री सेल्सियस दर्ज करी ज्यो। जयपुर मांय

दोपहरां री बगत सड़कां सूनी निजर आयी। बधती गर्मी रे कारण खेतां मांय नरमा कपास री बुवाई रा काम माथे असर पड़ रह्यो है। जैसलमेर मांय ई ज़ोरदार गर्मी पड़ रही है। म्हाणा खबरनवीस बतायो के ज़िला मांय पीवण रा पाणी री परेशानी ई आवण लाग्यी है।

जैसलमेर अर फलौदी हलकां मांय गर्मी अर लू रो नुवो दौर सरू व्हेवण री शंका है। काल ऊं जोधपुर अर बीकानेर संभाग मांय कठे-कठे अर 17 मई ऊं जयपुर अर भरतपुर संभाग रा कुछ हलकां मांय लू बाजण री शंका है। आज चित्तौडगढ़, राजसमंद, सिरोही, उदयपुर, डूंगरपुर, बांसवाड़ा, प्रतापगढ़, अर आरे-सारे रा हलकां मांय आंधी चालण, बीजळी पड़बा अर हल्की बिरखा व्हेवण रा आसार है।

ई बीचे शाहपुरा ज़िला मांय पड़ रह्या ज़ोरदार तावड़ा बीचे परिंदां सारू पाणी री व्यवस्था करण बाबत् ज़िला कलेक्टर राजेंद्र सिंह शेखावत कलेक्ट्रेट परिसर मांय परिंडा बांध्या।

0000

श्रीगंगानगर मांय राष्ट्रीय खाद्य सुरक्षा योजना रा गेहूं री भारतीय खाद्य निगम रा गोदाम ऊं ले र राशन डिपो ताई पूगावण रा काम री ऑनलाईन तरीका ऊं निगराणी राख्यी जावेला। जिला रसद अधिकारी सुमित्रा बिश्नोई बतायो के ई सारू ज़िला रा सगळा 771 राशन डिपो अर एफसीआई रा गोदाम री गूगल लोकेशन मैपिंग कर दीरीजी है।

0000

बून्दी ज़िला मांय सरकारी मोल माथे सरसों अर चणा री खरीदी सारू टोकन पंजीयन क्षमता मांय करीब 20 फीसदी री बधोतरी करी ज्यी है। ई पाछे सरसों अर चणा री सरकारी मोल माथे खरीदी सारू नाम मंडावण रो काम ओजू सरू करी ज्यो है।

000

टोंक जिला मांय कोथून-लालसोट हाईवे माथे निवाई कने दो ट्रकां री टक्कर रे कारण व्ह्या हादसा मांय एक जणा री मौत व्हे ग्यी अर दो जणा जख्मी व्हे ग्या। जख्मी लोगां रो चाकसू रा अस्पताल मांय ईलाज करी ज्यो।

0000

जोधपुर कने हिगाणिया मांय पुलिस 67 किलोग्राम गैर कानूनी डोडा पोस्त जब्त कीनो है। कापरड़ा हलका पुलिस थाणा कानी ऊं करीजी कार्रवाई रे दौरान 5 हजार रूप्या रा ईनामी अपराधी पप्पूराम ने गिरफ्तार करी ज्यो।

0000

000

प्रदेश रा गांवाई हलकां मांय नुवा सरकारी हॉस्टल खोलण सारु सर्वे अर सत्यापन रो काम कर्यो जा रह्यो है। सलूंबर जिला रा सेमारी हलका मांय आज सात सदस्यां री टीम ग्राम पंचायत उदात अर पाल धनकावाड़ा रो दौरा कर र हॉस्टल बणावण सारु प्रस्तावित ज़मीं देखी। टीम झल्लारा ब्लॉक रो ई दौरा कीनो।

000